

四庫全書

子部

欽定四庫全書

子部

薛氏醫案卷六十八

詳校官入醫院醫官臣姜晟

編修臣倉聖脈覆勘

總校官原任中允臣王燕緒

校對官庶吉士臣吳裕德

謄錄監生臣范光謙

欽定四庫全書

薛氏醫案卷六十八

明薛己訂

保嬰撮要十三

作痛不止

瘡瘍作痛當審邪之所在症之所因如寒熱而痛邪在表也用人參敗毒散便秘而痛邪在裏也用內疏黃連湯腫焮而痛血凝滯也用仙方活命飲作膿而痛者用

托裡消毒散排之膿脹而痛者針之膿潰而痛者補之
氣虛而痛則用四君歸芪血虛而痛則用四物參芪大
抵形傷痛氣傷腫不知此數者徒以乳香沒藥為止痛
之方則非所以為法矣仍審五臟相勝相兼之症而治
之後倣此

一小兒腿癰潰而作痛服敗毒之藥腫勢益甚更嘔腹
痛余謂膿出而反痛攻毒而反嘔其屬胃氣虛弱明矣
急宜補之或謂痛無補法仍用前藥諸症蜂起余用六

君乾薑木香胃氣漸復再用益氣湯托裡散而愈東垣
丹溪云膿出而反痛此為虛也宜補之穢氣所觸和解
之風冷所逼者溫養之信矣

一小兒臂瘡潰而作痛脉洪數而有力緣乳母食厚味
胃經積熱所致母服清胃散子服瀉黃散痛止又母子
服加味逍遙散而愈

一小兒項患瘡焮腫作痛左頰色赤此膽經熱毒母用
仙方活命飲末一服痛止再服而潰又用加味小柴胡

金匱要略卷六十八
湯加味逍遙散母子俱服而斂

一小兒左脇腫痛赤色而硬此稟膽經勢毒所致也子服活命飲母服加味小柴胡湯而軟又子服三味解毒散母服加味逍遙散而潰復惡寒不食腹脹吐酸此脾氣弱而飲食停滯也用六君子湯脾氣漸健用托裡散肌肉漸生又嘔吐寒熱面色青白此脾氣虛而肝邪所侮也用異功散加柴胡升麻而安又用異功散加當歸黃芪而愈

一小兒臂患瘡赤腫作痛服大黃藥敷鐵箍散腫痛頓消余曰此脾氣虛瘡內陷不知痛耳非毒退而內消也遂朝用益氣湯夕用異功散各數劑色微赤微腫又用葱熨法及托裡散而瘡消設或再用前藥則患處得寒而愈滯胃氣得寒而不生多致不起矣

一小兒臂瘡潰而作痛瘡口色白面赤飲湯此稟腎膀胱陰虛也朝用八珍湯夕用加減八味丸諸症漸退面色頓白此熱退而真虛之色見也用托裡散異功散而

愈

一小兒胸患瘡作痛發熱大小便秘此邪在裡也先用
大連翹飲一服熱痛頓止更以五味異功散加升麻白
芷而愈

一小兒面患瘡焮痛發熱惡寒此邪在表也先用荊防
敗毒散解其表邪次用七味白朮散固其胃氣而愈

一小兒背患瘡焮腫大痛發熱飲冷服敗毒之藥其痛
益甚此膀胱經熱毒熾盛也用活命飲加麻黃羌活一

劑諸症頓退乃去麻黃羌活又二劑而膿潰再用清熱
消毒飲而瘡痊次年腹患癰焮腫作痛大便不通其勢
雖劇悉屬形病俱實用活命飲加硝黃一劑大便即通
腫痛頓止又用清熱消毒散而痊

一小兒腿癰潰而膿清脉弱面色痿黃自汗有痰余謂
當補脾肺彼以為緩遂降火敗毒嘔吐喘嗽余曰脾肺
氣絕也不信後果歿

一小兒臂癰潰而面黃痰喘余謂稟脾腎氣虛不信乃

服四物黃栢知母而歿余治此症用地黃丸補中湯滋其化源多有生者若用四物黃栢之類益傷脾肺乃速其危矣

神效解毒散治一切瘡瘍作痛不止凡初起腫者服之即消已潰仍腫者服之即退已潰不解者服之即愈

嬰兒母亦服 自製

金銀花

錢一

甘草節

五分

黃芪

炒

皂角刺

炒

當歸

各三錢

乳香

沒藥

各二錢

右為末每服三錢酒煎為末溫酒調服亦可如瘡已潰腫痛已止者去乳沒金銀花倍加黃芪

黃連解毒湯治瘡瘍煩躁飲冷脉洪數或發狂言

黃芩

黃栢

黃連

俱炒

山梔

各一錢五分

右每用一二錢水煎熱服

內疏黃連湯治瘡瘍發熱而嘔大便秘結脉洪而實

黃連

炒

芍藥

炒

當歸

各二錢

檳榔

木香

各五分

黃芩

炒

梔子

炒

薄荷

桔梗

炒

甘草

連翹

大黃

各炒

錢一

每服一二錢薑水煎

乳香定痛散治瘡瘍潰爛疼痛

乳香

沒藥

各五錢

滑石

寒水石

煨各一兩

冰片

一錢

右為細末乾敷患處

小柴胡湯

加山梔牡丹皮即加味小柴胡湯

治肝膽經部分瘡瘍作痛

或身熱惡寒頸項強直胸脇作痛

方見脇癰

三味解毒湯

方見出血不止

加減八味丸

方見作渴不止

五味異功散

方見敗毒之藥

清胃散

四物湯

四君子湯

三方見腹癰

大連翹飲

方見臂癰

荆防敗毒散

即人參敗毒散加荆芥防風方見發斑

葱熨法

方見流注

清熱消毒散

方見熱毒口瘡

仙方活命飲

托裡消毒散

托裡散

三方見熱毒瘡瘍

七味白朮散

八珍湯

加味逍遙散

三方見發熱不止

瀉黃散

方見頭面瘡

作嘔不止

丹溪先生云腫瘍時嘔當作毒氣攻心治之潰瘍時嘔當作陰虛補之此論其常耳竊謂前症如腫赤焮痛而嘔者熱毒甚也用仙方活命飲作膿而嘔者胃氣虛也用五味異功散膿脹而嘔者血氣虛也用六君子加歸芪便秘而嘔者熱在臟也用內疏黃連湯寒藥服多而嘔者胃氣傷也用托裡健中湯食少胃寒而嘔者托裡益中湯中虛寒淫而嘔者托裡溫中湯肝氣乘脾而嘔

者托裡抑青湯胃虛停痰而嘔者托裡清中湯胃虛自
病而嘔者托裡益黃湯鬱結傷脾而嘔者托裡越鞠湯
徐院令云治癰疽不可一日無托裡藥確哉是言也蓋
毒氣者熱有餘也陰虛者脾不足也皆因脾氣虛弱以
致之但宜調補中氣則正氣復而邪氣自去矣嬰童當
兼治其母

一小兒臂患瘡服消毒之劑作嘔少食腫硬不消面色
痿黃此脾胃氣虛而藥復傷也用六君木香乾薑更增

腹痛此虛甚也以前藥入附子一片諸症頓退後飲食
停滯作嘔不食先用保和丸一服次用異功散而愈

一小兒腿癱膿清作嘔瘡口不斂肝腎二脉洪數此因
稟腎水不足而肝火為患用六味地黄丸以補腎九味
蘆薈丸以清肝而愈

一小兒手患瘡作嘔流涎面色痿黃余謂脾氣虛寒遂
用六君乾薑木香而嘔止又用補中益氣湯而涎止不
數劑而瘡愈

一小兒瘡痛作嘔手足並冷此因痛而胃氣復傷也用
六君乾薑藿香痛嘔頓止又用異功散加升麻柴胡而
瘡亦消

一小兒面患瘡作嘔手足並熱面赤作痛此胃經熱毒
所致先用仙方活命飲而痛止又用清熱消毒散而瘡
愈

一小兒腹患瘡作嘔便秘發熱飲冷畜熱也用內疏黃
連湯而便通嘔止又用清熱消毒散而瘡內消

一小兒腿患瘡用護心散嘔吐不食手足並冷余曰此非毒氣內攻乃胃虛耳宜用異功散補之彼反見疑仍索前藥余以異功散為末作護心散與服嘔止食進又用托裡散膿潰而愈後語其故猶不信其效至此也

一小兒臂患瘡服護心散嘔吐腹脹余曰此脾胃復傷耳不信仍復攻毒益加泄瀉余先用托裡溫中湯一劑次用六君薑桂又用五味異功散而愈

一小兒項患瘡作嘔面黃發熱飲湯余謂胃氣虛熱不

信反清熱敗毒更加吐瀉而歿

一小兒面患瘡作嘔發熱作渴飲湯余謂胃氣虛而作嘔不能化生津液而作渴不信另用禳藥攻毒致吐瀉吃逆而歿

托裏益黃湯治瘡瘍因脾胃虛弱寒水反侮土飲食少

思嘔吐泄瀉等症

自製

人參

白朮

炒各七分

陳皮

茯苓

半夏

炮薑

丁香

炙甘草

各三分

右薑水煎服

托裡越鞠散治乳母鬱怒肝脾內熱致兒患瘡瘍母子

並服 自製

陳皮

分四

川芎

人參

白朮

錢炒一

半夏

山梔

炒

蒼朮

分各三

炙甘草

分二

右薑棗水煎嬰兒乳母並服

托裡健中湯治瘡瘍陽氣虛寒腸鳴切痛大便溇泄嘔

逆昏憤此寒變而內陷也急用此藥緩則不救潰瘍

誤服寒劑多患之

自製

羌活

三分

木香

附子

炮

益智

丁香

沉香

各三分

茴香

五分

陳皮

炙甘草

五分

右薑水煎徐徐服之

托裡清中湯治瘡瘍脾胃虛弱痰氣不清飲食少思等

症

自製

人參

白朮

炒

陳皮

茯苓

各五分

半夏

三分

桔梗

二分

甘草

炒

柴胡

各二分

右薑棗水煎服

托裡溫中湯治瘡瘍元氣虛弱或因涼藥所傷飲食少

思嘔吐泄瀉等症 自製

人參

白朮

茯苓

各一分

半夏

炮薑

各四分

甘草

炒

肉桂

黃芪

炒各一錢五分

右每服三五錢薑棗水煎

托裡益中湯治瘡瘍中氣虛弱飲食少思或潰而不斂

或腫而不消 自製



人參

白朮

炒

陳皮

炒

茯苓

半夏

炮薑

各五分

木香

甘草

炒各三分

右薑棗水煎

托裏益青湯治瘡瘍脾土虛弱肝木所侮以致飲食少

思或胸膈不利

自製

人參

白朮

炒各五分

陳皮

炒

茯苓

半夏

各三分

芍藥

炒一分

柴胡

二分

右薑棗水煎服

保和丸

六味丸

二方見發熱不止

九味蘆薈丸

方見腮癰

六君子湯

方見腋癰

補中益氣湯

方見肌肉不生

五味異功散

方見用敗毒之藥

清熱消毒散

方見熱毒口瘡

仙方活命飲

托裡消毒散

托裡散

三方見熱毒瘡瘍

內疏黃連湯

方見作痛不止

出血不止

三

瘡口出血有因五臟相勝陰陽不調而血不止者有因乳母六淫七情之氣不平而血妄行者若因肝火內動用四物山梔牡丹皮肝經血虛用六味地黃丸心虛不能統血用四物參朮丹皮酸棗仁脾虛不能統血用四

君山梔牡丹皮脾氣鬱滯用歸脾湯脾肺氣虛用補中
益氣湯氣血俱虛用十全大補湯腎陰不足而肝火內
動用六味地黃丸柴胡梔子散加五味子大凡失血過
多而見煩熱發渴等症勿論其脉不問其症急用獨參
湯以補其氣經云血生於氣苟非參芪歸木甘溫之藥
決不能愈若發熱脉大者多不治

一小兒十一歲眉間一核似赤小豈許出血如注發熱
倦怠食少體倦此肝經血熱脾經氣虛也用柴芍參苓

散九味蘆薈丸而痊

一小兒流注出血吃逆腹痛手足並冷用六君子及獨參湯而益甚此陽氣虛寒之甚藥力未能驟及也遂連服數劑諸症漸退用月許將愈因飲食失宜寒熱發擗血出此脾氣虛肝火所乘也用異功散加升麻柴胡而安又用八珍四君而愈後因勞心發熱頭痛另服清熱之劑汗出口噤良久方省服大補湯數劑而安又用八珍湯而愈

一女子臂患瘡出血余謂血虛用聖愈湯而愈後因怒復作如前先用聖愈湯又用加味逍遙散將愈因惑於人言別服降火之劑吐瀉腹痛余用異功散聖愈湯而愈

一小兒頭瘡出血睡中發搐審其母素有鬱怒發熱用加味逍遙散加味歸脾湯母服之而子自愈

一小兒頭面生瘡出血右顙赤色口乾飲冷此胃經有熱先用清胃散漸愈又用三味解毒散而愈

一小兒臂瘡出血脉浮大按之無力右寸關為甚此脾肺氣虛不能攝血歸源先用補中益氣湯而血止又用托裏散而瘡愈

一小兒頭面生瘡出血作痛發熱飲冷此胃經熱甚而血妄行也先用仙方活命飲諸症頓愈又用清熱消毒散瘡口漸斂

一女子十四歲患瘰癧不時出血面青善怒余謂肝膽經氣虛而血不能歸經也欲滋腎水以生肝木不信反

清熱敗毒血不止而歿

一小兒患骨疽內潰膿出甚多後瘡口出血惡寒體倦
脈之如無余謂陽隨陰散而氣脫用獨參湯補之不信
而歿

東垣聖愈湯治諸瘡膿血出多心煩不安不得眠睡

當歸

川芎

分三

熟地黄

生地黄

各二分

黃芪

炒五分

人參

分三

右水煎服

歸脾湯治瘡瘍脾氣虛不能攝血歸經而瘡口出血
或乳母脾經鬱熱致兒患瘡發熱出血或瘡口不斂

者 方見脇癰

獨參湯治瘡瘍潰後氣血俱虛瘡口出血或發熱惡寒
作渴煩躁宜用此藥以補氣則血自生而歸經此陽
生陰長之理用人參一兩薑十片棗十枚水煎服

三味解毒散治瘡瘍熱毒出血或稟熱毒金石毒者尤

宜用之 自製

金銀花

一兩

甘草

五錢

牛黃

一錢量
人用之

右為末每服五分白湯調下

四物湯

方見脫癰

柴芍參蘇飲

方見熱毒瘰癧

柴胡梔子散

方見脇癰即梔子清肝散

六味地黃丸

方見作渴不止

加味逍遙散

當歸補血湯

二方見發熱不止

補中益氣湯

方見肌肉不生

十全大補湯

方見便癰

九味蘆薈丸

方見喉痺

四君子湯

清胃散

六君子湯

三方見腹癰

異功散

方見用敗毒之藥

托裡散

仙方活命飲

二方見熱毒瘡瘍

清熱消毒散

方見熱毒口瘡

肌肉不生

肌肉乃脾胃所生收斂皆氣血所主二者相濟以成者也若肌肉不生而色赤者血熱也用四物山梔牡丹皮
晡熱內熱者血虛也用四君歸地牡丹皮膿水清稀者
氣血俱虛也用十全大補湯食少體倦者脾氣虛也用
補中益氣湯煩熱作渴起居如常者胃熱也用荊葉黃

芪湯煩熱作渴小便頻數者腎虛也用六味地黃丸肉
腐而不潰者用烏金膏若肉潰而不斂者用六君子湯
穢臭脉洪大而作渴乃真氣虛而邪氣實也此為難治
大凡瘡瘍久而不愈者皆元氣不足或因邪氣凝滯於
患處苟能調補脾胃則元氣自足元氣既足則邪氣自
消死肉自潰新肉自生而瘡自斂矣使不保其本而緊
敷生肌之劑是反助其邪後更潰爛耳

一小兒臂癰久不斂日晡倦怠敷追蝕之藥腐壞而不

斂余謂因脾氣虛而不能生長肌肉朝用益氣湯夕用異功散月餘而痊

一小兒腿癰色赤久不生肌日晡發熱此脾經血虛也用四君歸芎柴胡牡丹皮熱漸止而肌漸生後因停食吐瀉瘡色變此脾氣虛弱用益氣湯異功散而痊

一小兒臀瘡久不生肌余曰臀屬膀胱乃氣血難到之所此稟腎虛而患者當調補脾氣滋養陰血遂用五味異功散地黃丸而痊

一小兒腎癰潰而不斂發熱作渴小便頻數仍欲降火
余謂此稟腎經陰虛而火動耳用補中益氣湯加減八
味丸而愈畢姻後腎復患癰欲速效服敗毒散潰而發
熱脈洪數而無力腎部為甚仍用益氣湯八味丸為主
佐以八珍湯異功散而愈

一小兒腿瘡久不生肌腫痛色赤此脾胃虛而濕熱也
用益氣湯加黃柏防已漸愈又用四君柴胡升麻而痊
一小兒臀瘡腐而作痛不止肌肉不生口乾作渴右關

脉洪數此胃經火盛之惡症先用竹葉黃芪湯二劑而痛止又以四君加升麻白芷而愈

一小兒臀間腫硬色不變面目皎白余謂稟腎不足反行敗毒日出清膿而歿

一小兒頸間腫硬余謂稟肝腎不足不信乃用襍藥後頤間胸脇膝骨皆腫各用火針出水瘡口開張而歿

補中益氣湯治小兒稟賦不足榮衛之氣短促寒薄腠理閉鬱而為瘡瘍或因瘡瘍服剋伐之劑氣血虧損

而不能消散或已潰氣血虧損而不能生肌或惡寒發熱煩躁倦怠飲食少思等症

人參

黃芪

炒

白朮

炒

甘草

炒

當歸

陳皮

各五分

柴胡

升麻

各三分

右薑棗水煎服

神效烏金膏治瘡瘍肉死不腐塗之即腐未死塗之即生若初起腫痛搽點數處其毒頓消若患頑瘡元氣無虧久不收斂內有毒根者以紙撚蘸絳之即斂其

方用巴豆仁一味炒黑研如膏點於患處臨用修合
庶不乾耳此法雖不出于方書余製而用之良有奇
驗故並籍焉

五味異功散

方見用敗毒之藥

四君子湯

方見腹癰

加減八味丸

即六味丸加五味子四錢肉桂一錢

四物湯

方見臍癰

十全大補湯

方見便癰

竹葉黃芪湯

六味地黃丸

二方見作渴不止

保和丸

方見發熱不止

發熱不止

瘡瘍發熱初患乃毒氣所焮已成乃內焮作膿已潰乃血氣虧損不可槩行敗毒以傷元氣蓋未成者當分邪之在表在裏將成者當分邪之可攻可補已成者當分膿之作與未作膿已成者當分膿之淺深高漫膿已潰

者當分痛之止與不止若作痛而發熱者用仙方活命
飲作膿而發熱者用托裏消毒散膿脹而發熱者用加
味托裏散膿出而發熱者用八珍黃芪午前發熱者陽
氣虛也用補中益氣湯午後發熱者陰血虛也用四物
加參芪日晡惡寒發熱者陽氣下陷於陰分也用補中
益氣湯發熱作渴小便頻數者腎氣虛弱也加減八味
丸膿血多而熱者陽無所附也十全大補湯日將晡而
熱者氣血虛也八珍湯若無寐而熱者內補黃芪湯煩

躁者血脫也當歸補血湯自汗而熱者胃氣虛也四君子湯惡寒發熱者肺氣虛也補中益氣湯或四君黃芪當歸主之亦有五臟相勝夾食夾驚或乳母六淫七情所致者不能備述治者臨症詳之

一小兒腿癰發熱腫痛肉色不赤此形氣虛而病氣實也先用活命飲二劑隨用益氣湯二劑外用葱熨法而愈

一小兒十五歲眉患癰傳服皆敗毒之藥腹痛腫硬此

脾胃復傷而然也朝用異功散夕用大補湯兩月餘而愈

一小兒十一歲腿內側患癰漫腫堅硬肉色不變自汗盜汗此稟肝脾虛羸也用大補湯異功散元氣漸復膿潰針之仍服前藥而愈

一小兒腿內股患瘡發熱不愈診乳母肝脾血虛有熱用異功散加柴胡升麻及加味逍遙散與乳母服兒日服數匙兩月餘而愈

一小兒臂癰腫痛色白余用托裡之劑不從反外用
敗毒之劑發熱不食手足並冷仍欲敗毒余曰此脾胃
復傷而變症耳若再行攻毒則胃氣益損五臟皆虛諸
症蜂起矣乃用益氣湯佐以異功散而漸安

一小兒潰後發熱飲乳不歇面目或赤此胃氣虛熱津
液不足而作渴也用白朮散末以乳調服而愈後發熱
作嘔吐酸腹膨此乳食停滯先用保和丸異功散各末
一服又用托裡散八珍湯而瘡斂

一小兒潰後發熱懶食日晡益甚此脾氣虛弱也先用四君升麻歸芪飲食漸進次用八珍牡丹皮發熱漸止後用托裡散而痊

一小兒腹癰潰後發熱作渴手足並冷余謂脾胃陽虛用六君薑桂治之不信反清熱敗毒果吃逆腹痛而歿一小兒臀癰潰而發熱面色青白服敗毒藥益甚余謂脾氣虛寒而隔陽於外非熱也用人參理中湯不信後吐瀉手足並冷而歿

加味托裡消毒散治潰瘍餘毒發熱作痛

人參

錢一

黃芪

錢一

當歸

酒拌一錢

川芎

芍藥

炒

白芷

茯苓

各五分

金銀花

甘草

連翹

乳香

沒

藥

各三分

右作二劑水煎服

八珍湯治潰瘍氣血俱虛者用此方主之若因脾氣虛弱而不能生血者宜用異功散

當歸

錢一

川芎

五分

芍藥

炒七分

熟地黃

酒拌

人參

白朮

炒
茯苓 各一錢
甘草 炙五分

右每服三五錢薑棗水煎

加味逍遙散治因乳母肝脾血虛發熱致兒患瘡或兒
肝脾有熱致瘡不愈

當歸 甘草 炙 芍藥 酒拌 茯苓 白朮 炒各一錢 柴胡

牡丹皮 山梔 炒各七分

右作四劑水煎服若乳母肝脾血虛內熱或寒熱遍
身搔痒等症尤宜用之

七味白朮散治胃氣虛弱或因尅伐或因吐瀉口乾作

渴飲食少思

作渴飲冷者去木香

藿香 白朮 木香 白茯苓 甘草 炒 人參

乾葛

各等分

右每二錢水煎服

保和丸治飲食停滯發熱者不可多服

神麴 炒 山查 半夏 茯苓 陳皮 各一錢 連翹

蘿蔔子

各半兩

右為末糊丸小桐子大每服二三十丸白湯送下化

服亦可

加白朮名大安丸

當歸補血湯治瘡瘍血氣虧損或妄服峻劑致血氣俱
虛肌熱大渴喜飲目赤面紅晝夜不息其脈洪大而
虛重按全無其症似宜服白虎湯但脈不長實為可
驗耳若服白虎湯必死

黃芪

炙一兩

當歸

二錢

右水煎徐徐服

內補黃芪湯治潰瘍膿水出多或過服敗毒之劑致氣

虛血弱發熱無寐或兼盜汗內熱或不生肌

自製

黃芪

炒二錢

人參

白朮

炒

茯苓

陳皮

當歸

各一錢

錢半

五味子

杵

甘草

炒各五分

酸棗仁

炒一錢

右水煎徐徐服

十全大補湯

方見便癰

葱熨法

方見流注

補中益氣湯

方見肌肉不生

四君子湯

六君子湯

二方見腹癰

仙方活血飲

五味異功散

托裡散

托裡消毒散

四方見熱毒瘡瘍

加減八味丸

方見作渴不止

大便不通

瘡瘍大便不通初起則審所致之因所見之症而行內
疏外表之法已潰則分血氣虛實傳變之症而用托裏
滋補之法不可泛用苦寒疏導之劑恐復傷真氣則腫
者不能消散成膿潰者不能生肌收斂故丹溪先生云
腫瘍內外皆壅宜托裏表散為主潰瘍內外皆虛宜托
裏補接為主治者審之

一小兒胸患癰腫痛熱渴大便不通脈沉數而有力此
形病俱實而邪在內也用涼膈散大便隨通而痛頓減

又用活命飲焮腫隨散瘡頭出膿又用托裡消毒散而愈

一小兒腹癰腫痛大便不通脈洪數而有力兩寸關為甚此表裏俱有邪也用大連翹飲去大黃一劑大便頓通再用活命飲一劑諸症頓退又用清熱消毒散而消一小兒臂癰腫痛大便乾澀用瀉黃散但面色痿黃此脾經氣血虛也先用補中益氣湯加熟地黃兩月餘大便漸利惡寒發熱此邪氣去而真氣虛也用托裡散八

珍湯而痊

一小兒腎癰潰而作渴煩熱大便不通脉洪大而虛用當歸補血湯及四物加黃芪各二劑而便通又用八珍湯托裏散而瘡斂

一女子患流注大便不通乾澀色赤或黃頭運惡寒此脾肺氣虛而血弱也用補中益氣湯加桃仁杏仁麻子仁而大便潤去三仁加蔓荊子而頭運又用托裏散而瘡痊

一女子患瘰癧便結面赤口乾晡熱此肝腎陰虛而內熱也先用加減八味丸八珍湯兩月餘大便漸通又用加味逍遙散佐以五味異功散而大便通用九味蘆薈丸而瘡愈

一小兒十五歲瘰癧二年矣余謂稟腎肝陰虛燥熱用地黃丸之類而愈後大便結燥用通幽湯為主佐以八珍湯之類兩月餘而漸愈彼欲速効另服碑記黑丸子通而不止虛症並臻余仍用前法半載而痊

一小兒流注愈而大便秘結發熱作渴兩頤赤色余謂
腎肝陰虛用地黃丸通幽湯而愈次年畢姻後大便仍
秘用潤腸丸余曰東垣云少陰不得大便以辛潤之以
苦泄之不信仍用前藥後果歿

一小兒腹癰潰而大便澁滯面赤作渴余謂腎開竅於
二陰乃稟腎陰不足不信反用疏導之藥泄瀉不止而
歿

一小兒臂癰潰而大便秘或利而後重或虛坐努力

余謂脾氣虧損用補中益氣湯不悟仍用下利之藥吃
逆腹痛而致

涼膈散治實熱大便不通或咽腫作痛口舌生瘡或便
溺赤澁發熱譫語睡卧不安

大黃 朴硝 甘草 連翹 山梔 黃芩 薄荷

荷葉

各等分

右為末每服少許蜜湯調服

大連翹飲

方見臂癱

清熱消毒飲

方見熱毒口瘡

加味逍遙散

當歸補血湯

二方見發熱不止

補中益氣湯

方見肌肉不生

活命飲

托裏散

二方見熱毒瘍

九味蘆薈丸

方見喉痺

大便不止

瘡瘍泄瀉不止或因膿血出多脾氣有傷或命門火衰不能生土或脾氣虛寒不能司攝或稟腎虛不能禁固或乳母脾胃虧損元氣下陷致兒為患若瀉而煩熱無寐脾氣虛也用東垣聖愈湯瀉而口乾飲湯胃氣虛也用錢氏白朮散瀉而煩渴飲水胃經有熱也用東垣瀉黃散瀉而色黃飲食不化或腹中作痛脾氣虛弱也用六君加木香瀉而色黃小腹重墜或大便去而不了脾氣下陷也用補中益氣湯瀉而色青飲食少思腹中作

痛肝木侮土也用六君木香升麻柴胡東垣先生云診
右關脉弦風邪傷脾也用芍藥甘草湯之類右關脉洪
熱邪傷脾也用三黃丸之類右關脉緩本經濕邪傷脾
也用平胃散之類右關脉濇燥邪傷脾也用異功散加
當歸或四君子湯加熟地黄之類右關脉沉細寒邪傷
脾也用益黃散理中丸之類寒甚加附子大凡飲沸湯
而不知熱者陽氣虛寒之症也急用四君桂附飲水
而不知寒者陽氣亢熱之症也急用清涼飲之類又法

以手足並冷者為虛寒用五味異功散加薑桂不應急
加附子手足不熱者為虛熱用五味異功散七味白朮
散手足並熱者為實熱用瀉黃散多有更生者

一小兒臂癱久潰飲食後即泄瀉小腹重墜面色或痿
黃或皎白兩寸脉短不及本位按之若無此脾氣虛寒
下陷不能升化而然用八味丸補命門火佐以益氣湯
以培胃氣月餘漸愈更佐以二神丸兩月餘而瘡愈
一小兒腿癱潰後泄瀉飲食少思手足並冷多在侵晨

夜間此變脾腎虛寒也用四神丸六君薑桂漸愈以益氣湯間服而愈

一小兒便癰久不愈泄瀉面黃手足時冷小便重墜此脾氣虛弱下陷之惡症也朝用益氣湯內人參五錢白朮二錢夕用異功散內人參三錢白朮二錢更以人參一兩煎湯代茶兩月餘而愈至十七歲畢姻後患便癰泄瀉手足並冷幾危余謂命門火衰用八味丸益氣湯而愈

一小兒流注潰後作瀉飲食難化余謂脾氣虛弱用六君子湯而愈後因停食泄瀉手足並冷用六君薑桂不應用人參一兩附子一錢數劑諸症始退却用獨參湯月許而愈

一小兒瘰癧泄瀉面青腹脹審乳母乳頭乳房作痛蓋乳房屬胃經乳頭屬肝經乃肝木勝脾土而然耳兒病正屬是經乃母子同病也朝用益氣湯夕用六君升麻柴胡為主佐以四味肥兒丸母子同服並愈

一小兒瘰癧泄瀉服分利之劑小便不利面黃少食余謂因脾肺氣虛不能分布諸臟朝用益氣湯夕用異功散諸症悉愈

一小兒瘰癧作瀉面青腹脹此脾虛而肝侮也用異功散為主以四味肥兒丸為佐諸症漸愈却用肥兒丸為主異功散為佐而愈

一小兒臀癰久不愈大便泄瀉小便不調發熱作渴余謂腎開竅於二陰故二便不調此稟腎氣虛熱而然也

用地黃丸益氣湯之類諸症漸退肌肉漸生瘡口自愈
一小兒瘰癧兼瀉形氣骨立此肝脾疳症用異功散三
劑却用蚶蟞丸一服月餘而愈

一小兒十五歲已近女色患此服十宣散久不愈余謂
當大補元氣不信致惡寒發熱或作渴唾痰或頭目眩
運或手足發熱去後大小便牽痛形體骨立余謂此精
血未滿而虧損所致用補中益氣湯加減八味丸日以
人參二兩煎湯代茶三月餘而愈

一小兒十五歲腿癱將愈而作瀉余用補中益氣湯及六君子湯而愈後因功課勞神飲食失節或時復瀉余謂胃氣未復仍用前藥不信另服消導之藥泄瀉不止而歿夫胃氣平和飲食入胃精氣則輸於脾上歸於肺行於百脉而成榮衛若飲食一傷起居不時損其胃氣則上升精華之氣反下降而殮泄非升陽補氣決不能愈

八味地黄丸治諸瘡因命門火衰不能生脾土致血氣

虛弱不能生肌而瘡口不合或變諸敗症又諸瘡愈後小便頻數大便作泄飲食不入作渴發熱肌肉不生之聖藥但世人未經試驗而不信用惜哉

熟地黄

用生地黄酒浸透砂器內九蒸九晒仍晒乾八兩

牡丹皮

白茯苓

苓

澤瀉

各三兩

山茱萸

酒拌取肉

山藥

各四兩

炮附子

一兩

肉桂

用厚者括去外皮淨一兩

右以地黄酒拌濕杵膏各味為末和勻再入酒糊丸少許量大小白湯送下

四神丸治瘡瘍脾虛胃弱大便不實飲食少思或泄瀉
腹痛又治腎虛五更初瀉

肉苳蔻

二兩

補骨脂

四兩

五味子

二兩

吳茱萸

一兩

右為細末用紅棗六十五枚生薑六兩水二鍾煮乾
取棗肉丸桐子大每服二三十丸白湯送下或化服
二神丸治瘡瘍因脾腎陰虛泄瀉

補骨脂

四兩

肉苳蔻

二兩
生用

右為末用紅棗四十九枚生薑四兩水一鍾煮乾取

棗肉丸桐子大每服二三十九白滾湯下

補中益氣湯

方見肌肉不生

五味異功散

方見用敗毒之藥

六味地黃丸

方見作渴不止

六君子湯

方見腹癰

獨參湯

方見出血不止

四味肥兒丸

方見貼骨癰

蚶蟞丸

方見諸疳口瘡即蟾蜍丸

小便不通

瘡瘍小便不通者其因不一當分經絡虛實而藥之若
心小腸熱而不通者用黃連導赤散心經氣虛用養心
湯肝經實熱用龍膽瀉肝湯肝經虛熱用地黃丸脾經
實熱用瀉黃散脾經虛熱用四君子湯肺經實熱用黃
芩清肺飲肺經虛弱用補中益氣湯腎經燥熱用滋腎
丸腎經虛熱用地黃丸設若潰而惡寒發熱氣血虛也
用八珍湯手足並冷陽氣虛寒也用四君子湯加乾薑

升麻手足不冷乃脾氣虛弱也用四君柴胡升麻半夏
寒熱往來氣血虛也用十全大補湯大便了而不了脾
氣虛而下陷也用補中益氣湯切不可輕用疏導之劑
復傷元氣致腫者不能起發腐潰潰者不能生肌收斂
須臨症制宜而治庶無悞矣

一小兒頭患瘡小便不利胸滿少食此脾肺氣虛也先
用益氣湯飲食頓進又用八珍湯加五味子小便頓利
末用托裡散而痊

一小兒患腹癰小便不利大便乾實此形病俱實先用八正散一劑二便隨通又用加味清胃散二劑再用仙方活命飲一劑而痊

一小兒兩脇胸間或兩腿內側患瘡瘍小便不利或作或輟診乳母肝脾脉洪數母服加味逍遙散子服梔子仁散加柴胡而痊

一小兒臂瘡服敗毒之藥小便不利腹脹作嘔此胃氣復傷陽氣虛弱而然耳先用六君薑桂一劑嘔脹頓止

再用異功散小便如常後用托裡散而瘡愈

一小兒患流注小便不利面白口乾手足時冷悉因脾肺氣虛之所致也用益氣湯加山藥五味子諸症漸愈又用托裏散而瘡愈

一女子臂瘡飲食少思小便不利余謂脾肺氣虛不能化生先用四君黃芪當歸小便尋利又用五味異功散托裏散而瘡愈

一小兒患便癰誤服敗毒之劑虧損元氣不能成膿余

用托裏之藥潰之而愈後小便不利面色痿黃四肢時冷余謂脾肺氣虛不能下輸膀胱用補中益氣湯不信另服滲利之藥嘔吐腹痛手足並冷余先用四君薑桂再用補中益氣湯之類元氣漸復小便漸利

一小兒患腹癰潰而膿清不斂面色青黃余謂肝木侮脾土用六君柴胡升麻及補中益氣湯之類而愈後小便頻數而少服木通車前之類乃純陰淡滲之味善傷陽氣經曰無陽則陰無以生無陰則陽無以化非純陽

補氣之藥不救不信後果歿

一小兒腹癰潰而膿水清稀煩躁時噉小便如淋仍欲分利余曰此脾肺氣虛之惡症分利導損真陰之所致也急補脾肺脾肺氣旺則小便自調諸症自愈奈何不悟余言仍服前藥以致不起惜哉

梔子仁散治小便不通或兼見血或臍腹脹悶煩躁不安

冬葵子

茅根

各三分

甘草

二分

梔子仁

炒五分

右水煎或為末服亦可

八正散治瘡瘍內蘊熱毒大小便不利

大黃

炒三分

山梔

炒

篇蓄

車前子

炒二分

瞿麥

滑

石

木通

各二分

右水煎服

海金沙散治下焦濕熱不施化而小便不利

海金沙

鬱金

滑石

甘草

各等分

右各為末每服四五分白湯調下

清心蓮子飲治發熱口乾小便不利或兼白濁夜則安
靜晝則發熱

黃芩

炒

麥門冬

地骨皮

車前子

炒

甘草

各三錢半

石蓮肉

搗碎

茯苓

黃芪

炒

柴胡

人參

各二錢五分

右每服二錢水煎

黃芩清肺散治肺燥而小便不調

黃芩

炒一錢

山梔

一箇杵

右水煎服

滋腎丸治腎熱而小便不調

黃栢

酒拌炒
黑三兩

知母

炒三兩

肉桂

三錢

右為末水糊丸麻子大每服三五十九白湯下水調服亦可

導赤散

方見臂癰

內疏黃連湯

方見作痛不止

八珍湯

方見發熱不止

補中益氣湯

方見肌肉不生

活命飲

托裡散

二方見熱毒瘡瘍

六君子湯

方見腹癰

小便不止

瘡瘍小便不止有膀胱氣虛而不能禁止者有膀胱虛熱而自遺者有肺經傳熱遺於膀胱而然者有肺虛不能生腎而然者有稟腎虛早近女色而然者治法膀胱氣虛用六味丸六一散膀胱有熱用六味丸滋腎丸肺

經遺熱用清肺散六味丸肺氣虛用益氣湯六味丸早
近女色而小便不止或大小便牽痛者乃腎肝虧損所
致作渴飲冷屬虛熱用六味丸補中益氣湯作渴飲熱
屬虛寒用八味丸補中湯精血篇云男子精未滿而御
女色以通其精五臟有不滿之處異日有難狀之疾老
人陰已痿而思色以降其精則精不出而內敗小便澀
痛如淋愈痛則愈便愈便則愈痛若不條分縷析而泛
投襍藥則悞矣

一小兒項腋結核潰而體瘦發熱小便不止此稟肝膽之經血氣虛熱而然也先用加味逍遙散五味異功散為主以地黃丸為佐月餘以地黃丸為主五味異功散加當歸柴胡為佐諸症漸愈又以四味肥兒丸間服而愈

一小兒陰囊時腫余謂胎稟肝火不信後患便癰潰後小便淋瀝或時澄白此肝火為患潰久肝氣虛弱而小便如斯也蓋虛則補其母腎為肝之母用地黃丸滋腎

水以補肝漸愈因功課勞心兼怒不時寒熱小便如淋用加味逍遙散而寒熱止却用地黃丸為主佐以四味肥兒丸而愈

一小兒流注久潰面白時咳膿水清稀小便短少或如淋不止余謂脾肺氣虛不能生肝腎而然用補中益氣湯六味地黃丸為主佐以托裏散而漸愈又間用豆豉餅而斂

一小兒鶴膝風久潰小便頻數後淋瀝不止面色黑或

皎白飲食少思四肢倦怠此腎之脾胃虛也朝用補中益氣湯夕用五味異功散飲食漸加肢體漸健却用地黃丸而愈

一小兒早近女色患脇癰潰而小便如淋服分利之劑更加腹脹小便不止莖中作痛大便自遺余謂稟腎陰虛也當急補脾肺以滋化源不信仍服分利之藥而歿

黃芩清肺飲

滋腎丸

二方見小便不通

加味逍遙散

方見發熱不止

四味肥兒丸

方見貼骨癰

豆豉餅

方見流注

八味丸

方見大便不止

五味異功散

方見用敗毒之藥

作渴不止

瘡瘍作渴當分經絡所屬及血氣虛實而治若焮痛發熱便利調和者邪在腑也用清熱消毒散腫痛發熱大

便秘澁者邪在臟也先用瀉黃散如未應用涼膈散焮
痛熾盛邪在經絡也用仙方活命飲右關脉洪數有力
者胃火消爍津液也用竹葉石膏湯右關脉數無力者
胃虛津液短少也用補中益氣湯飲食失度胃氣內傷
而亡津液者用錢氏白朮散膿血出多而氣血虛弱者
用八珍湯加五味子稟腎不足而津液短少者用加減
八味丸其餘當臨症制宜

一小兒右頰患瘡作渴飲冷目黃唇烈此脾胃實熱也

用瀉黃散而愈後傷食作渴遍身皆黃少用瀉黃散黃退而渴益甚此熱退而真氣虛也用白朮散而痊

一女子臂癱口乾飲湯小便頻數此脾肺氣虛用四君黃芪乾薑及益氣湯而愈

一小兒腹癰潰後作渴飲湯此脾胃氣虛用六君黃芪當歸而渴止用異功散而瘡斂

一女子面瘡作渴飲湯面赤此脾氣虛熱也先用異功散又用益氣湯而愈

一小兒素食膏粱口舌生瘡作渴飲冷手足常熱此胃
經積熱先用竹葉石膏湯二劑又用竹葉黃芪湯二劑
漸愈再用白朮散去木香而愈又一小兒所患同前先
用清胃散再用涼膈散而愈

一小兒患瘰癧面赤作渴余謂肝腎虛熱用加減八味
丸補中益氣湯六味地黃丸月餘諸症頓愈佐以九味
蘆薈丸而愈

一小兒口乾作渴發熱泄瀉諸藥不效皆謂不起右關

脉弦數按之沉伏尋揣腹中隱伏一塊鷄卵大此肝脾
疝也用蟾蜍丸三月而消兼服地黃丸三月諸症漸退
却以白朮散而愈

清燥湯治一切瘡瘍癰疽潰後氣血虛怯濕熱乘之遍
身酸軟或夏秋濕熱肺金受傷絕寒水生化之源腎
無所養小便赤澁大便不調腰腿痿軟口乾作渴體
重麻木頭目眩暈飲食少思自汗體倦胸滿氣促氣
高而喘身熱而煩

黃芪

一錢五分

蒼朮

一錢

白朮

陳皮

澤瀉

各五分

五味

子

九粒

人參

白茯苓

升麻

各五分

麥門冬

當歸

身

生地黄

神麴

炒

猪苓

酒栢

各五分

柴胡

黃連

甘草

炙各三分

右薑水煎服濕痰壅盛參芪歸地之類可暫減之

生脉散治金瘡等症發熱體倦氣短或汗多作渴或睡

卧不寧陽氣下陷發熱煩燥或六七月間濕熱大行

火土合病令人脾胃虛弱身重氣短或金為火制絕

寒水化源肢體痿軟脚軟眼昏宜服之

人參

錢五

五味子

錢一

麥門冬

右水煎服

竹葉黃芪湯治氣血虛胃火盛而作渴者

淡竹葉

錢二

黃芪

生地黃

麥門冬

當歸

川

芎

甘草

黃芩

炒

芍藥

人參

石膏

煨各

錢一

右水煎服

竹葉石膏湯治胃火盛而作渴者

淡竹葉

石膏

炒

桔梗

木通

薄荷

甘草

各一

錢

右薑水煎服

瀉黃散治胃經實熱患瘡口渴飲冷

藿香葉

七葉

石膏

煨五錢

甘草

三錢

防風

山梔仁

炒各一兩

右為末每服二錢水煎入蜜少許嬰兒乳母服之

東垣聖愈湯

方見出血不止

五味異功散

方見用敗毒之藥

補中益氣湯

方見肌肉不生

七味白朮散

方見發熱不止

清熱消毒散

方見熱毒口瘡

仙方活命飲

方見熱毒瘡瘍

清胃散

方見腹癰

敷寒涼藥

十一

瘡瘍敷藥當分陰陽虛實而用內治之法不可槩敷寒涼之藥若腫痛熱渴脈滑數而有力者其症為純陽宜

服濟陰湯外敷抑陽散則熱毒自消瘀滯自散若似腫
非腫似痛非痛似赤非赤似潰非潰脉洪數而無力者
其症屬半陰半陽宜內服沖和散外敷陰陽散則榮逆
自從血鬱自散若微腫微痛色黯堅硬肉色如故久而
不潰脉按之沉細舉指虛浮者其症屬純陰宜內服回
陽湯外敷抑陰散則寒氣自解陽氣自復凡陽氣虛寒
不能消散腐潰或潰而腫不消口不斂者必內外溫補
庶可保全若陰寒之症而用寒涼之藥則腠理迷塞氣

血凝滯毒氣益深良肉反死瘡口不斂惡症蜂起不可復救矣蓋胃氣得寒則不能運行瘀血得寒則不能消散死肉得寒則不能腐潰新肉得寒則不能化生治者不可不察也

一小兒面瘡敷寒涼之藥患處堅實頭面俱腫此脾胃受寒血氣凝滯而不能行耳先用沖和湯陰陽散患處和軟次用托裏消毒散堅腫頓消又用托裡散瘡潰而愈

一小兒腹癰敷寒涼之藥腹脹吃逆手足並冷此脾胃復傷而虛寒也用回陽湯抑陰散諸症漸退用托裏散而潰八珍湯而愈

一小兒潰瘍敷寒涼之藥肌肉不生膿水不止余謂脾氣虧損而然用異功散加升麻白芷漸愈又用托裏散而痊

一小兒臂癰敷服皆寒涼之藥更加腫硬余謂當助脾胃以解凝寒乃用益氣湯加茯苓半夏薄桂及如聖餅

熨之而愈大凡瘡瘍久而不愈不問已潰未潰皆因陽氣虛不能運行耳用如聖餅或葱熨法為善

一小兒兩足脛內外赤腫焮連膝上因痘愈之後或謂痘毒欲用寒劑或謂丹毒欲砭出血余曰非也此足三陽經熱毒壅腫耳况痘愈之後元氣未復設若砭刺出血則患處愈傷敷貼涼藥則榮氣愈滯服敗毒之藥則元氣愈虛瘀血愈凝不信竟用前法果兩脛潰而色黯瘡口不斂大便去後如痢欲用治痢之藥余曰此因誤用

前法元氣復傷而下陷也非痢非毒遂用補中益氣湯之類而愈

一小兒大腿漫腫不赤服敗毒之藥手足並冷吐瀉不食余曰元氣虛而半陰半陽之症也用陰陽散沖和湯腫起色赤此變純陽之吉症也仍用前藥佐以活命飲而消

一小兒臂癱面色痿黃飲食少思脉洪數按之軟弱余謂真氣虛而邪氣凝滯也用白芷升麻湯以清胃經熱

毒用五味異功散以補胃經元氣不信反用寒涼之劑
外敷內服腫硬至手肉色如故腹中作痛脉浮大按之
沉細此脾胃之氣復傷而變虛寒之症也當祛散寒邪
溫補脾氣仍不信又與敗毒吃逆不食手足並冷此寒
氣逼陽於外無根之火泛行耳果死手足俱青患處皆
黑

一小兒足脛腫硬一塊年餘而潰時出清膿其腫益堅
肉色青黯發熱煩躁余謂真氣虛而邪氣實當先調脾

胃或以為熱毒凝滯敷寒涼之藥腫硬至膝肉潰腹脹吐瀉而死

托裡沖和湯治瘡瘍屬半陰半陽似潰非潰似腫非腫因元氣虛弱失於補托所致

自製

人參

二錢

黃芪

三錢

白朮

炒

陳皮

當歸

各一錢

甘草

五錢

分

右水煎徐徐服手足冷者加薑桂其熱已退而未消潰用仙方活命飲可內消者再用托裏消毒散可作

膿者再用托裡散

陰陽散

即沖和膏

治瘡瘍元氣虛弱似腫非腫似痛不痛似

熱不熱屬半陰半陽之症用此以和陰陽內服沖和湯或托裡散以助元氣

赤芍藥

炒

白芷

石菖蒲

各二兩

獨活

炒三兩

紫荊皮

炒五分

右為末用葱酒調服

托裡回陽湯治瘡瘍屬純陰不腫痛不焮赤不腐潰或

腹痛泄瀉嘔吐逆冷陽氣既陷急用之多有生者

自製

乾薑

附子

重一兩
四錢者

當歸

陳皮

白朮

黃芪

人參

甘草

炒各
二錢

柴胡

升麻

各三
分

右水煎徐徐服之如不應倍加薑附外傳抑陰散

一方

名回陽

玉龍膏

抑陰散治瘡瘍元氣虛寒不能消散或腹痛泄瀉吐嘔
不食手足或冷或不潰斂筋攣骨痛或跌撲所傷為
敷涼藥及癰腫堅硬肉色不變久而不潰潰而不斂

一切冷症並效

草烏

二錢

南星

一兩煨

軍薑

一兩

白芷

一兩

肉桂

五錢

赤芍藥

炒一兩

右為末葱湯調塗或熱酒調塗

七味白朮散

方見發熱不止

清熱消毒散

方見熱毒口瘡

清胃散

方見腹癰

東垣聖愈湯

方見出血不止

陰陽散

即沖和膏

抑陽散

沖和散

白芷升麻湯

益氣湯

五方見肌肉不生

異功散

方見敗毒之藥

五味異功散

方見敗毒之藥

仙方活命飲

托裡消毒散

托裏散 三方見熱毒瘡瘍

補中益氣湯 方見肌肉不生

八珍湯 方見發熱不止

如聖餅

葱熨法 二方見流注

服敗毒藥

小兒瘡瘍多由胎稟遺熱或乳哺積熱或乳母七情致

熱經云五臟不和九竅不通六腑不和留結為癰又云
氣主噓之血主濡之治者當察其經絡所因表裏虛實
而調和以固其本假如腫痛熱渴大便秘結者邪在內
也宜疏通之腫焮作痛寒熱頭疼者邪在表也宜發散
之焮腫痛甚者邪在經絡也宜和解之漫腫微痛而不
潰者血氣虛弱也宜補托之色黯微痛而不潰或潰而不
斂者陽氣虛寒也宜溫補之如是則五臟自和六腑
自調氣血自生瘡毒自解此即敗毒之法也若槩用寒

涼之劑復損脾胃則腫者不能消散潰者不能收斂七
惡蜂起多致不救矣

一小兒臂癰腫硬色白寒熱倦怠此因血氣虛耳先用
五味異功散加木香乾薑諸症漸減去二味又佐以托
裡散如聖餅膿潰而愈

一小兒臂癰服敗毒藥腫硬不消汗出不止此脾肺氣
虛也用異功散加五味子而汗止佐以葱熨法而膿成
用托裡散而瘡愈

一小兒腿癰膿水清稀手足時冷余謂脾胃虛寒先用益氣湯加乾薑而手足溫用異功散葱熨法而膿稠用八珍湯附子餅而瘡愈

一小兒面生瘡寒熱頭痛服大黃等藥連瀉數度手足並冷瘡黯吃逆余曰此邪在表誤攻其裡下多而亡陰也後果歿

一小兒腿癰服麻黃等藥汗出喘急手足並冷余謂此陰虛誤汗而亡陽也後果歿

五味異功散治稟賦元氣虛弱肌肉消薄榮衛短促而患瘡瘍不能消散或脾肺氣虛不能生肌收口大凡諸症因脾氣虛而不能愈者皆宜服之調補元氣則自愈矣

人參

茯苓

白朮

炒

甘草

炒

陳皮

各等分

右為末每服二三錢薑棗水煎

托裡散

方見熱毒瘡瘍

葱熨法

如聖餅

二方見流注

八珍湯

方見發熱不止

十全大補湯

方見便癱

補中益氣湯

方見肌肉不生

附子餅

方見貼骨癱

用刀針法

小兒瘡瘍用針法比之大人尤宜慎重當審經絡表裏之虛實部分肌肉之厚薄而施之夫腫高而軟者發於

血脉也腫硬而堅者發於肌肉也肉色不變者發於骨也瘡未成者解散以消其毒已成者托裡以速其膿膿已成者當驗其生熟淺深而後針之以指輕按便痛者膿淺也重按方痛者膿深也按之不起者膿未成也按之即起者膿已成也若膿初生而即針則泄其氣血而膿反難成若膿已熟而不針則腐潰益深而不能收斂若瘡深而針淺則肉潰不出外血反傷若瘡淺而針深則其膿雖出良肉亦傷蓋瘡瘍之症氣血已傷肌肉已

壞當隨決其毒不可拘泥人神部分其膿一出諸症自退若膿出反痛或煩躁嘔逆者皆由胃氣虧損急宜托裡調補凡膿已成者宜急刺去以紙蘸蘸油絛瘡內以膏藥貼之兒安不必服藥如瘡反覆未痊多是乳母食厚味或七情火動而然當審所因而調治其母但藥中加漏蘆令母服之乳中藥過兒瘡自愈

一小兒患瘡腫硬或用針出血寒熱嘔吐乃胃氣虛而復傷也用異功散而嘔止用八珍湯而血止用托裡散

而瘡愈

一小兒項間患毒膿成未潰欲急刺之不從至脹痛始針出膿用托裡散而安若及時用針不用藥亦可也

一小兒項間患毒膿內潰脹痛此脾肺氣虛而不能外潰也用大補湯四劑針之清膿滴瀝發熱惡寒用獨參湯四劑膿湧泄乃用大補湯托裡散而愈東垣先生云氣血壯實膿自湧出信矣

一小兒臂癱用針過深出血不止惡寒口噤脉微細尚

可救乃用獨參湯灌之良久嚥下半晌而甦再劑而能
言四劑而膿出又用托裡散異功散而愈

一小兒項瘡膿成不出兩腮皆白余曰此肝膽經之症
腮白乃肺經之色金能尅木當急用針并補脾氣不信
竟歿

五味異功散 方見用敗毒之藥

八珍湯 方見發熱不止

托裡散 方見瘡瘍熱毒

十全大補湯

方見便癰

五善七惡

瘡瘍之症齊氏陳氏有五善七惡之論又云五善見三則瘡七惡見四則危竊謂前症各有所屬之經各有所主之方蓋五善屬六腑氣血無虧人能調攝不治自愈七惡乃五臟虧損失於滋補所致非瘡瘍自有也調治失宜必致不起如動息自寧飲食知味乃胃氣平和一善也便利調勻乃腸胃調和二善也膿潰腫消水鮮不

臭乃邪氣去而胃氣平復三善也神彩精明語言清亮
乃心肺氣血無虧四善也體氣平和脾胃無虧五善也
作渴發熱或泄瀉淋閉者屬胃火內淫一惡也竹葉黃
芪湯氣血俱虛八珍加黃芪麥門冬山茱萸未應佐以
加減八味丸料潰而腫痛尤甚膿色臭敗者屬胃虛火
熾二惡也人參黃芪湯未應十全大補湯加麥門冬五
味子目視不正黑睛緊小白睛青赤瞳子上視者屬肝
腎虛火二惡也六味丸料加山梔麥門冬五味子未應

八珍湯加山梔麥門五味喘麤氣短恍惚嗜卧者屬脾
肺虛火四惡也六君子加薑棗未應用補中益氣湯加
麥門五味若心火刑肺人參平肺散陰火傷肺六味丸
料加五味子煎服瀆後肩背不便四肢沉重者屬脾胃
虧損五惡也補中益氣湯加山茱萸山藥五味子如不
應用十全大補湯加山茱萸山藥五味子食不下咽服
藥而嘔食不知味者屬胃氣虛弱六惡也六君子湯加
木香砂仁未應加附子聲嘶色敗唇鼻青赤面目浮腫

者脾肺俱虛七惡也補中益氣湯加薑棗未應加附子
若腹痛泄瀉咳逆昏憤者陽氣虛寒之惡症也用托裡
溫中湯次以六君子湯加附子薑桂若潰後發熱惡寒
作渴怔忡驚悸寤寐不寧牙關緊急或頭痛目赤自汗
盜汗寒戰咬牙手撒身熱脈洪大按之微細厚衣仍寒
此氣血虛極傳變之惡症也若手足逆冷肚腹疼痛泄
瀉腸鳴飲食不入吃逆嘔吐者此陽氣虛寒之惡症也
若無汗惡寒口噤足冷腰背反張頸項強直此血氣虛

極轉變之惡症也急用參芪歸朮附子救之夫小兒患之因胃氣虛弱或膿血出多虛邪內作或乳母失調血氣不和致兒為患能審其所致之因而主之亦有復生者若更與攻毒乃促其亡也

一小兒臂瘡肉腐色紫焮痛作渴右關脈洪數此胃火熾盛之惡症用竹葉黃芪湯而痛止用四君升麻連翹白芷金銀花而愈

一小兒流注吐瀉吃逆腹痛手足並冷余謂陽氣虛寒

之惡症用六君子獨參湯益甚遂以人參五錢附子五分連服數劑諸症漸退復用獨參湯月許稍愈後飲食失宜寒熱發搐用五味異功散加升麻柴胡而安又因勞發熱脉大而虛面赤作渴用當歸補血湯十全大補湯而安用八珍湯附子餅而愈

一小兒腹癰潰而腫痛益甚飲食少思此脾胃復傷之惡症先用五味異功散加木香諸症漸愈乃用異功散加當歸黃芪元氣漸復又用八珍湯托裏散而愈次年

畢姻後寒熱往來患處作痒用大補湯地黃丸而愈

一小兒脇腫一塊敷寒涼之藥益加腫硬腹中陰冷余謂肌肉受寒而患處腫硬脾氣受寒而腹中陰冷當急溫補脾氣不信仍服前藥加腹痛泄瀉手足並冷余曰變陽氣虛寒之惡症用五味異功散加薑桂二劑諸症漸愈乃去二味服之外用葱熨之法患處微腫色赤此陰氣散而陽氣至遂朝用補中益氣湯夕用異功散而消

一女子股間結一核不作痛不變色服散堅之劑患處
腫硬更頭運吐痰其脉弦數而無力心脾俱虛不信仍
用攻伐果吐瀉腹痛發搐吃逆余謂變脾土虛寒之惡
症也先用五味異功散加乾薑肉桂脾氣稍復乃用異
功散八珍湯而愈

一小兒腿癱潰後作渴飲湯瀉利無度此脾胃氣虛之
惡症也用益氣湯八珍湯而愈後功課用心口乾作渴
小便頻數用益氣湯加五味及黃芪六一湯各五十餘

劑而痊

一小兒腿癰內潰泄瀉自汗腹痛氣喘余謂脾胃俱虛之惡症用獨參湯喘汗漸止用大補湯諸症悉退後傷食吐瀉用五味異功散加乾薑而愈次年畢姻後患腹癰膿清不斂朝寒暮熱用益氣湯八珍湯各百餘劑而愈

一小兒患瘰癧服追毒之藥更惡寒發熱手足並冷右寸脈浮按之而虛用益氣湯百餘劑而稍愈彼欲速效

另服石膏之類吐瀉昏憤脉浮大按之微細乃變陽氣
虛寒之惡症也用人參二兩附子一錢二劑而甦數劑
而安更以五味異功散月餘而愈

一女子十五歲瘰癧發熱晡熱左腮赤甚余謂肝火血
虛用加味逍遙散五味異功散九味蘆薈丸而痊後服
斑猫等藥惡症蜂起手足並冷用參附湯二劑六君薑
附四劑乃朝用益氣湯夕用異功散而愈

一女子患臙瘡腫痛發熱脉洪大而虛此血虛之惡症

也用當歸補血湯煩熱悉止用補中益氣湯佐以加味逍遙散及葱熨法而痊

一女子脇間患癰色白漫腫寒熱不潰余謂稟肝脾虛羸之惡症用補托之藥而愈後因經事過期誤服行血之劑發熱煩躁先用當歸補血湯次用逍遙散八珍湯而愈

一小兒十五歲脇癰膿清晡熱盜汗遺精此元氣虛甚之惡症也用大補湯地黃丸料元氣漸復因犯色慾患

處色黯昏憤吃逆手足並冷用獨參湯四劑而甦用大
補湯加乾薑六劑陽氣漸復乃去薑又二十餘劑而痊
一小兒十四歲面目多白足跟腫硬寸許肉色如常遇
勞腫硬宛若一粟口乾面赤余謂稟足三陰經虛症不
信外敷內服皆敗毒之劑翻如熟榴煩躁時嗽腹痛渴
瀉小便如淋余曰此脾肺氣虛之惡症也不信仍復敗
毒更黑睛緊小白睛青赤瞳子土看此肝腎虧損之惡
症併矣余欲救其胃氣以滋五臟又為人所阻用千金

消毒散更加喘短氣恍惚余曰惡症並臻其何能為或問惡症既甚無乃攻毒之晚耶余曰邪正不並立一勝一負理之自然胃氣虛則邪氣實也其失在於不預補正氣邪氣勝則惡症集耳東垣先生云但見腫痛叅之脉症虛弱便與滋補氣血無虧可保終吉信斯言也

一小兒臀間腫硬肉色如故小便短赤而頻服分利之劑膝脛骨腫余曰腎主骨此稟腎虛所致前藥導損腎陰而骨腫耳當調補脾肺以坐腎水其骨自消不信仍

用前藥而歿

一小兒腹癰久不斂余欲滋其化源反清熱敗毒惡症
蜂起而歿夫肺者腎之母脾者肺之母前症既不滋肺
腎以生肝木又用寒涼之藥復傷胃氣以絕肺腎之化
源不死鮮矣

一小兒貼骨癰作瀉余欲施調補不信反復分利兩手
撮空肝氣敗也泄瀉無度腎氣敗也痰涎上湧脾氣敗
也喘嗽不止肺氣敗也額間汗出心氣敗也辭不治果

歿

一小兒腿癱腫痛自汗盜汗體倦食少余用托裡之藥而膿成欲針之或用大黃之類令膿從大便出致大瀉腹痛余謂脾胃虛脫之惡症急服大補之劑不信又服前藥而死

一女子十五歲外股腫硬連及內股肉色不變右關脉緩弱按之弦數此脾虛而肝乘之氣血虛而色不變也當補脾土為主不信另用流氣飲水黃散泄瀉腹痛瘡


口開張而殍

參附湯

人參一兩附子製二錢

右薑棗水煎不拘時服

餘方見各症



薛氏醫案卷六十八